

史
通
訓
故

慈羊鳴傳於抱朴子朱紫不別穢莫大焉沈氏著書

好誣先代於晉則故造奇說在宋則多出謗言前史

所載已譏其謬矣而魏收黨附北朝尤苦南國承其

詭妄重加誣語遂云司馬叡出於牛金王劭沈約晉書造奇說云

瑯琊國姓牛者與夏侯妃私通生中宗因遠敘宣帝

以毒酒殺牛金符證其狀收因此乃云司馬叡晉將

牛金子也宋孝王曰收以戲為金子計其年全劉駿

不相干按前史尚如此誤况後史編錄者耶

上淫路氏沈約宋書曰孝武於路太后處寢息時人多有議魏書因云駿蒸其母路氏醜聲播

越也於甌可謂助桀為虐幸人之災尋其生絕胤嗣死遭

割斷一作蓋亦陰過之所致也晉世雜書諒非一族

若語林世說幽明錄搜神記之徒其所載或恢諧小

果

辨或神鬼恠物其事非聖揚雄所不觀其言亂神宣
尼所不語唐朝所撰晉史多採以爲書夫以千鄧之
所糞除王虞之所糠粃以爲逸史用補前傳此何異
魏朝之撰皇覽梁世之脩通畧務多爲美聚博爲功
雖取悅小人終見嗤於君子矣夫郡國之記譜牒之
書務欲矜其州里誇其氏族讀之者安可不練其得
失明其真僞者乎至如江東五雋始自會稽典錄潁
川八龍出於荀氏家傳而脩晉漢史者皆徵彼虛譽
定爲實錄苟不別加研覈何以詳其是非又訛言難
信傳聞多失至如曾參殺人無疑盜嫂翟義不死諸

葛猶存此皆得之於行路傳之於衆只儻無明白其
誰曰然故蜀相薨於渭濱晉書稱嘔血而死魏君崩
於馬圈齊史云中矢而亡沈炯罵書河北以爲王常
魏收草檄關西謂之邢邵夫同說一事而分爲兩家
蓋言之者彼此有殊故書之者是非無定况古今路
阻視聽壤隔而談者或以前爲後或以有爲無涇渭
一亂莫之能辨而後來穿鑿喜出異同不憑國史別
訊流俗及其記事也則有師曠將軒轅並世公明與
方朔同時堯有八眉夔唯一足烏白馬角救燕卅而
免禍犬吠鷄鳴逐劉安以高蹈此之乖濫往往有旃

故作者惡道聽途說之違理、街談巷議之損實。觀夫子長之撰史記也、殷周已往、採彼家人、安國之述、陽秋也、梁益舊事、訪諸故老夫、以蒭蕘鄙說、刊爲竹帛、正言而輒欲與五經方駕、三志競爽、斯亦難矣。嗚呼、逝者不作、冥漠九泉、毀譽所加、遠誣千載、異辭疑事、學者宜善思之。

校十二字

前漢書劉向典校秘書採古今紀傳行事之跡、綴其正辭美義、可爲勸戒者、以類相從、爲說苑二十卷新序三十卷。

淮南子禹通轅轅塗山氏欲餉之、戒之曰、聞鼓乃來。禹跳石、誤中鼓塗山氏至、見禹爲熊、慚而去。至嵩山下、化爲石。禹曰、歸我子石。破北方而生啟。呂氏春秋伊尹之母居伊水之上、孕夢有神告之曰、曰水出而東走、無顧。母明日視曰、出水東走、顧

其邑盡爲水身因化爲桑有莘氏女採桑得嬰兒
空桑之中獻之其君君令乳之命曰伊尹
荆楚歲時記漢武帝命張騫使大夏尋河源乘槎
經月而至一處見一女織又見一丈夫牽牛飲于
河問曰此何處曰可問嚴君平至蜀問之曰某年
某月客星犯牛女
淮南子羿請不死之藥於西王母嫦娥竊以奔月
晉書稽康字叔夜譙郡鉅人少有奇才歷官中散
大夫著高士傳自混沌至管寧凡百一十九人缺
一自擬

晉書皇甫謐字士安安定朝那人漢太尉嵩曾孫
有高名于世舉孝廉不行自號玄晏先生

後漢書王喬河東人顯宗世爲葉令有神術每朔
望常自縣詣臺朝帝恠其來數而不見車騎密令
太史伺望之言其臨至輒有雙鳧飛來于是候鳧
至舉網張之但得一雙鵲詔上方診視則四年中
所賜尚書官屬履也

後漢書左慈字元放廬江人少有神道操不喜因
坐上欲收殷之乃卻入壁中霍然不知所在後人
逢慈于陽城山嶺復逐之遂走入羊羣操知不可

得乃今就羊中告之曰不復相殺本試君術耳忽一老羝屈膝而人言曰遽如許競往赴之而羝羊皆變爲羝莫知所取

晉書葛洪字稚川丹陽句容人歷官諮議參軍以交趾出川求爲勾漏令著書內外一百一十六篇自號抱朴子因以名書

南史世祖孝武皇帝諱駿字休龍小字道人文帝第三子初封武陵王後誅元凶劼卽位

北史魏收既緣史筆多憾于人齊亡之歲收冢被發棄其骨于外收無子先養弟子仁表爲嗣位至

尚書膳部郎中

裴氏家傳裴榮字榮期河東人少有才氣好論古

今人物撰語林

晉書于寶父有所寵侍婢母妬父亡母生推婢于墓中後十餘年母喪開墓而婢復蘇又寶兄嘗病

氣絕積日不冷後遂悟云見天地間鬼神事如夢

覺寶以此遂撰集古今神祇靈異人物變化名爲

搜神記凡二十卷

前漢書揚雄自有大度非聖哲之書不好也魏志文帝黃初中散騎侍郎劉邵等受詔集五經

羣書以類相從凡千餘篇號曰皇覽

梁書武帝天監十五年劉峻撰類苑成帝卽命學士何思澄等撰華林遍畧以高之

晉書薛兼字令長丹陽人清素有器宇少與同郡紀瞻廣陵閔鴻吳郡顧榮會稽賀循齊名時號爲江東五雋

後漢書荀淑字季和潁川潁陰人歷官朗陵侯相有子八人儉親靖肅汪爽肅專并有名稱時人謂之八龍

史記昔曾參之處費魯人有與同姓名者殺人人告其母曰曾參殺人其母織自若也頃之一人又告之母尚織自若也頃又一人告之其母投杼下機踰牆而走

前漢書直不疑南陽人也初爲郎遷太中大夫人或毀不疑曰不疑狀貌甚美然母柰其善盜嫂何也不疑聞曰我乃無兄然終不自明也

前漢書翟義字文仲丞相方進少子爲東郡太守王莽居攝義心惡之遂與上蔡陳豐舉兵兵敗自殺後漢書王郎立爲天子詔云已詔聖公及翟太守與功臣詣行在所蓋郎以百姓思漢旣多言

翟義不死故詐稱之

蜀志諸葛亮於建興十二年悉大衆由斜谷出與司馬宣王對於渭濱分兵屯田爲久住之基相持百餘日八月亮疾病卒于軍魏書云亮糧盡勢窮

憂恚咽血一夕燒營遁走入谷道發病卒

北史魏孝文二十三年齊將陳顯達攻陷馬圈戌三月車駕南伐丙戌帝不豫四月丙午帝崩于穀塘原之行宮至魯陽發喪

南史沈炯字初明吳興武康人爲侯景將宋子仙逼掌書記

北齊書侯景據河南反文襄當國議者咸云景猶有北望之心文襄以爲然乃遺書招之景報以書文襄覽書問爲誰作或曰其行臺郎王常文襄曰常才如此何因不使我知

魏志管輅字公明平原人卜有奇驗歷官少府丞淮南子脩務訓若夫堯眉八彩高誘注云堯母慶都出觀于河有赤龍負圖而至曰赤龍受天下之圖有人赤衣光面八彩奄然陰雲與慶都合而生堯視如圖故眉有八彩之色

韓子哀公問孔子曰吾聞夢一足信乎曰夢人也

何故一足彼其無他異而獨通于聲堯曰夔而一足矣使爲樂正故君子曰夔有一足非一足也
燕冊子太子冊質于秦秦王遇之無禮不得意欲歸秦王不聽謬之曰烏白頭馬生角乃可冊仰天嘆烏卽頭白馬卽生角秦王不得已而遣之列仙傳淮南王安好仙道于是入公乃詣王授冊經安臨仙去餘藥器在庭中鷄犬舐之皆得飛昇

載文第十六

夫觀乎人文以化成天下、觀乎國風以察興亡、是知
文之爲用、遠矣大矣、若乃宣僖善政、其美載於周詩、
懷襄不道、其惡存於楚賦、讀者不以吉甫奚斯爲諂、
屈平宋玉爲謗者、何也、蓋不虛美、不隱惡、故也、是則
文之將史、其流一焉、固可以方駕南董、俱稱良直者
矣、爰洎中葉、文體大變、樹理者多以詭妄爲本、飾辭
者務以淫麗爲宗、譬如女工之有綺縠、音樂之有鄭
衛、蓋語曰、不作無益、害有益、至如史氏所書、固當以
正爲主、是以虞帝思理、夏后失御、尚書載其元首禽

荒之歌、鄭莊至孝、晉獻不明、春秋錄其大隧狐裘之
什、其理謹而切、其文簡而要、足以懲惡勸善、觀風察
俗者矣、若馬卿之子虛上林、揚雄之甘泉羽獵、班固
兩都、馬融廣成、喻過其體、詞沒其義、繁華而失實、流
宕而忘返、無裨勸獎、有長奸詐、而前後史漢皆書、列
傳不其謬乎、且漢代詞賦雖云虛矯、自餘它文大抵
猶實、至於魏晉已下、則僞繆雷同、推而論之、其失有
五、一曰虛設、二曰厚顏、三曰假手、四曰自戾、五曰一
槩何者、大道爲公、以能而授、故堯咨爾舜、舜以命禹
自曹馬已降、其取之也則不然、若乃上出禪書、下陳

讓表其間、勸進殷勤、敦諭重沓、跡實同於莽卓、言乃類於虞夏、且始自納陛、迄于登壇、彤弓盧矢、新君膺九命之錫、白馬侯服、舊主蒙三恪之禮、徒有其文、竟無其事、所謂虛設也、古者兩軍爲敵、二國爭雄、自相稱述、言無所隱、何者、國之得喪、如日月之蝕焉、非由飾辭矯說所能掩蔽也、逮於近古、則不然、至如曹公歎蜀主之英畧、曰劉備吾儔、周帝美齊宣之強盛、云高歡不死、或移都以避其鋒、或斷水以防其渡、及其申誥誓、降移檄、便稱其智昏、菽麥識昧、玄黃列宅、建都若鷦鷯之巢葦、臨戎賈勇、猶螳螂之拒轍、此所謂

厚顏也。古者詔命皆人主所爲。故漢光武時第五倫爲督鑄錢掾。見詔書而歎曰：「此聖主也。」一見決矣。至於近古則不然。凡有詔勅皆責成群下。但使朝多文士。國富辭人。肆其筆端。何事不錄。是以每發璽誥。下綸言。申惻隱之渥恩。敘憂勤之至意。其君雖有返道敗德。惟頑與暴。觀其政令。則辛癸不如。讀其詔誥。則勛華再出。此所謂假手也。天子無戲言。苟言之有失。則取尤天下。故漢光武謂龐萌可以託六尺之孤。及聞其叛也。乃謝百官曰：「諸君得無笑朕乎。是知褒貶之言。哲王所慎。至於近古則不然。凡百具寮王公卿。」

士始有褒崇則謂其珪璋特達善無可加旋有貶黜則比其斗筭不才罪不容責夫同爲一士之行同取一君之言愚智生於倏忽是非變於俄頃帝心不一皇鑒無恒此所謂自戾也夫國有否泰世有污隆作者形言本無定准故觀猗歟之頌而驗有殷方興覩魚藻之刺而知宗周將殞至於近代則不然夫談主上之聖明則君盡三五述宰相之英偉則臣皆二八國止方隅而言併吞六合福不盈眦而稱感致百靈雖人事屢改而文理無易故善之與惡其說不殊欲令觀者疇爲准的此所謂一槩也於是考茲五失以

尋文義雖事皆形似而言必憑虛夫鏤冰爲璧不可得而用也、畫地爲餅不可得而食之、是以行之於世、則上下相蒙、傳之於後、則世人不信、而世之作者復不之察、聚彼虛說、編而次之、初自起居成於國史、連章畢錄、一字無廢、非復史書、更成文集、若乃類選衆作、求其穢累、王沉魚、秦是其甚焉、裴子野何之元抑其次也、陳壽于寶、頗從簡約、猶時載浮訛、固盡機要、唯王劭撰齊隋二史、其所取也、文皆諸實、理多可信、至於悠悠飾詞、皆不之取、此實得去邪從正之理、捐華摛實之義也、蓋山有木工、則度之、况舉世文章、豈

無其選、但苦作者書之不讀耳。至如詩有常孟諷諫、賦有趙壹嫉邪、篇則賈誼過秦、論則班彪王命、張華述箴於女史、張載題銘於劔閣、諸葛表主以出師、王昶書家以誠子、劉向谷永之上疏、晁錯李固之對策、荀伯子之彈文、山巨源之啟事、此皆言成軌則、爲世龜鏡、求諸歷代、往往而有。苟書之竹帛、持之不刊、則其文可與三代同風、其事可與五經齊列、古猶今也。何遠近之有哉。昔夫子脩春秋、別是非、申黜陟、而賊臣逆子懼、凡今之爲史而載文也、苟能撥浮華、採真實、亦可使夫彫虫小伎者、聞義而知徙矣。此乃禁淫

之隄防持雅之管轄凡爲載削者可不務乎

校十五

詩崧高維嶽降神生甫及申小序尹吉甫美宣王之能建國親侯褒賞申伯也烝民保茲天子生仲山甫小序尹吉甫美宣王任賢使能周室中興也詩魯頌四篇皆頌僖公嚴粲詩緝云小序云史克作是頌其末章云新廟奕奕奚斯所作謂作新廟也而班固王延壽相承皆云奚斯所作之詩誤矣屈原離騷荃不察余之中情兮反信讒而齊怒宋王九辨既驕美而伐武兮負左右之耿介皆刺譏之辭

前漢書宣帝曰辭賦大者與古詩同義小者辨麗可喜辟如女工有綺縠音樂有鄭衛書舜典元首明哉股肱良哉

書太康尸位以逸豫戚厥德五子怨之作歌曰內作色荒外作禽荒甘酒嗜音峻宇雕牆有一于此未或不亡

春秋左傳鄭伯克段于鄆寘姜氏于城穎而誓之曰不及黃泉無相見也既而悔之見穎考叔而語之故對曰若闕地及泉隧而相見其誰曰不然公

從之公入而賦大隧之中其樂也融融遂爲母子如初

春秋左傳初晉侯使士蔿爲申生築蒲夷吾築屈不愼公使讓之對曰三年將尋師焉焉用愼退而

賦曰狐裘尫茸一國三公吾誰適從

前漢書司馬長卿請爲天子游獵賦上令尚書給

筆札相如以子虛虛言也爲楚稱烏有先生烏有此事也爲齊難無是公者無是人明天子之義故

空籍此三人爲詞以推明天子諸侯之苑囿其卒

章歸之節儉因以諷諫

前漢書楊雄字子雲蜀人官黃門侍郎成帝以趙

飛燕無嗣往祀甘泉宮雄以制度壯麗作甘泉賦

以諷帝出遊獵雄從又奏羽獵賦

後漢書班固當顯宗時授蘭臺令史時帝脩洛陽

宮室西土父老怨帝不都長安固乃作兩都賦以

諷

後漢書馬融字季長扶風杜陵人時鄧太后臨朝

鄧騭兄弟輔政俗儒以文德可興武功可廢遂寢

蒐符之禮息戰陣之法故得賸從橫乘此無備肆

以五材之用無或可廢乃作廣成頌以諷注廣成

苑名在汝州梁縣西

山陽公載記魏武爲劉備所敗引軍從華容道步歸遇泥濘道不通天又大風悉使羸兵負草填之乃得過及出大喜謂諸將曰劉備吾儔也但得計少晚向若早放火吾徒無類矣

北史高洋天保元年周文帝帥師至陝城分騎北度丙寅文宣親戎出次城東周文見軍容嚴盛嘆曰高歡不死矣遂班師

後漢書第五倫字伯魚長陵人鮮于褒薦于京兆尹閭興時長安鑄錢多奸巧乃署倫爲督鑄錢掾每讀詔書常嘆息曰此聖主也一見中央矣

史記帝乙崩子辛立是爲帝辛天下謂之紂

史記帝癸崩子帝履癸立是爲桀

後漢書龐萌山陽人爲人遜順光武愛之稱曰可以託六尺之孤寄百里之命者龐萌是也拜平狄將軍與蓋延共擊董憲時詔書獨下延而不及萌萌以爲延譖已遂反帝聞之大怒自將討萌與諸將書曰吾嘗以龐萌爲社稷之臣諸君得無笑其言乎討平之

詩商頌那章猗與那與小序祀成湯也

詩小雅魚藻魚在在藻有頌其首小序刺幽王也言萬物失其性王在鎬將不能自樂也

晉書王沉字處道晉陽人歷官秘書監撰魏書後漢書趙壹字元叔漢陽西縣人恃才倨傲為鄉

黨所擯作解擯又為疾邪賦以舒其憤後漢書隗囂挾隴間班彪曰往者周末諸侯並爭

天下分裂意者縱橫之事復起于今乎彪乃作王命論以明神器不可妄覬以諷之

晉書張載字孟陽武邑人父收為蜀郡太守載隨父入蜀過剡閣作銘刺史張敏見而奇之表上其

文世祖遣使鑄石記焉

蜀志後王建興五年諸葛亮率軍北駐漢中臨發上表

魏志王和字文舒太原人歷官散騎侍郎其為兄子及子作名字皆依謙實以見其意兄子默字處靜沉字處道子渾字玄冲深字道冲為書戒之曰欲使汝曹遵儒者之教履道家之言願名思義不敢違越也

後漢書李固字子堅南鄭人司徒郃之子陽嘉二

帝有地動山崩火災之異公卿舉固對策詔又特

問當世之敝爲政所宜帝覽其對多所納用
宋書荀伯子頴陰人晉驃騎將軍羨之孫也遷御
史中丞凡所奏劾深相訶毀或延及祖彌示其切
直世人以此非之
晉書山濤字巨源河內人居選職十有餘年所奏
甄拔人物各爲題目時稱山公啟事

補注第十七

昔詩書既成而毛孔立傳傳之時義以訓詁爲主亦猶春秋之傳配經而行也降及中古始名傳曰注蓋傳者轉也轉授於無窮注者流也流通而靡絕惟此二名其歸一揆如韓戴服鄭鑽仰六經裴李應晉訓解三史開導後學發明先義古今傳授是曰儒宗既而史傳小書人物雜記若趙岐之三輔決錄陳壽之季漢輔臣周處之陽羨土風常璩之華陽士女文言美辭列於章句委曲叙事存於細書此之注釋異夫儒士者矣次有好事之子思廣異聞而才短力微不

能自達、庶憑驥尾千里絕群、遂乃掇衆史之異詞、補前書之所闕、若裴松之三國志、陸澄劉昭兩漢書、劉彤晉紀、劉孝標世說之類是也、亦有躬爲史臣、手自刊削、雖志存該博、而才闕倫叙、除煩則意有所悞、畢載則言有所妨、遂乃定彼榛楛、列爲子注、若蕭大圜淮海亂離志、楊銜之洛陽伽藍記、宋孝王關東風俗傳、王劭齊志之類是也、權其得失、求其利害、少期集注國志以廣承祚所遺、而喜聚異同、不加刊定、恣其擊難、坐長煩蕪、觀其書成表獻、自比蜜蜂兼採、但甘苦不分、難以味同萍實者矣、陸澄所注班史多引司

馬遷之書若乃此缺一言彼增半句皆採摘成注標

爲異說有昏耳目難爲披覽

蜀本作搜宋本作披

竊惟范曄之

刪後漢也簡而且周疎而不漏蓋云備矣而劉昭採其所捐以爲補注言盡非要事皆不急譬夫人有吐菓之核棄藥之滓而愚者乃重加捃拾絜以登薦持此爲工多見其無識也孝標善於攻繆博而且精固以察及泉魚辨窮河豕嗟乎以峻之才識足堪遠大而不能探賸彪嶠綱羅班馬方復留情於委巷小說銳思於流俗短書可謂勞而無功費而無當者矣自茲已降其失逾甚若蕭楊之瑣雜王宋之鄙碎言殊

揀金事比雞肋異體同病焉可勝言大抵撰史加注者或因人成事或自我作故記錄無限規檢不存難以成一家之格言千載之楷則凡諸作者可不詳之至若鄭玄王肅述五經而各異何休馬融論三傳而競爽欲加商榷其流寔煩斯則義涉儒家言非史氏今並不書於此焉

前漢書韓嬰燕人也孝文時爲博士嬰推詩之意而爲內外傳數萬言

前漢書后倉說禮數萬言授梁戴德延君戴聖次君德號大戴聖號小戴

後漢書服虔字子慎河南滎陽人歷官九江太守作春秋左氏集解行于世

後漢書鄭玄字康成北海高客人注易詩書禮記毛詩譜

宋書裴駟字龍駒河東聞喜人仕中郎外兵曹參軍注史記

前漢書注有李斐不詳所出李奇南陽人後漢書應劭字仲瑗汝南南頓人歷官泰山太守

注漢書

前漢書注晉灼河南人歷官尚書郎注漢書

蜀志楊戲字文然犍爲武陽人爲尚書右選部郎以延熙四年撰季漢輔臣贊

晉書常璩字道將歷官散騎常侍撰華陽國志華陽梁州地也記漢以來巴蜀人物

宋書裴松之字世期河東聞喜人歷官散騎侍郎宋太祖元嘉中使注陳壽三國志松之鳩集傳記

增廣異聞既成表上曰竊性績事以衆色成文蜜

絳以兼采爲味故能使細素有章甘踰本質云云家語孔子曰吾昔過陳聞童謠曰楚王渡江得萍

實大如斗赤如日剖而食之甜如蜜

南史劉昭字宣卿高唐人梁天蓋中累遷臨川王記室昭伯父彬集衆家晉書注千寶晉紀昭集後

漢同異注范曄後漢書注稱博悉

梁書劉峻字季業梁天監中詔入百官自三公

峻注劉義慶世說

北史蕭大園字仁顯梁簡文第二十子元帝封爲
晉熙郡王元帝降魏從至長安降封始寧公
後漢書何休字邵公任城樊人精研六經作春秋
公羊解詁與羊弼追述李育意以難二傳
後漢書馬融嘗欲訓左氏春秋及見賈逵鄭衆注
乃曰賈君精而不博鄭君博而不精既精既博吾
何加焉但著三傳異同說

因習上第十八

蓋聞三王各異禮、五帝不同樂、故傳稱因俗易貴、隨時、況史書者、記事之言耳、夫事有貿遷、而言無變革、此所謂膠柱而調瑟、刻船以求劒也、古者諸侯曰薨、卿大夫曰卒、故左氏傳稱楚鄧曼曰、王薨於行、國之福也、又鄭子產曰、文襄之伯、君薨、大夫弔、即其證也、按夫子脩春秋、實用斯義、而諸國皆卒、魯獨稱薨者、此畧外別內之旨也、馬遷史記、西伯已下、與諸列國王侯、凡有薨者、同加卒稱、此豈畧外別內邪、何貶薨而書卒也、蓋著魯史者、不謂其邦爲魯國、撰周書者、

不呼其王曰周王如史記者事總古今勢無主客故
言及漢祖多爲漢王斯亦未爲累也班氏既分裂史
記定名漢書至於述高祖爲公王之時皆不除沛漢
之字凡有異方降款者以歸漢爲文肇自班書首爲
此失迄于仲豫仍踵厥非積習相傳曾無先覺者矣
又史記陳涉世家稱其子孫至今血食漢書復有涉
傳乃具載遷文按遷之言今實孝武之世也固之言
今當孝明之世也事出百年語同一理卽如是豈陳
氏苗裔祚流東京者乎斯必不然漢書又云嚴君平
旣卒蜀人至今稱之皇甫謐全錄斯語載於高氏傳

夫孟堅士安年代懸隔、至今之說、豈可同云、夫班之習馬、其非既如彼、謚之承固其失、又如此、迷而不悟、奚其甚乎、何法盛中興書、劉隗錄、稱其議獄事具刑法志、依檢志內了、無其說、既而臧氏晉書、梁朝通史、於大連之傳、並有斯言、志亦無文、傳乃虛述、此又不精之咎、同於玄晏也、尋班馬之列傳、皆具編其人姓名、如行狀尤相似者、則共歸一稱、若刺客曰者、儒林循吏是也、范曄既移題目於傳首、歷姓名於卷中、而又於列傳之下、注爲列女高隱等目、苟姓名既書、題目又顯、是鄧禹寇恂之首、當署爲公輔者矣、岑彭吳

漢之前當標爲將帥者矣、觸類而長、實繁其徒、何止
列女孝子、高隱獨行而已、魏收著書、標榜南國、桓劉
諸族、咸曰島夷、是則自江而東、盡爲卉服之地、至於
劉昶、沈文秀等傳、敘其爵里、則不異諸華、劉裕等傳皆云丹徒楚人也、沈文秀等傳則云吳興武康人豈有君臣共國、父子同姓、閭閻

季札、便致土風之殊、孫策、虞翻、乃成夷夏之隔、求諸
往例、所未聞也、當晉宅江淮、實膺正朔、嫉彼羣雄、稱
爲僭盜、故阮氏七錄、以田范裴段諸記、劉石苻姚等
書、別朔一名、題爲僞史、及隋氏受命、海內爲家、國靡
愛憎、人無彼我、而世有撰隋書之經籍志者、其流別

羣書還同阮錄按國之有僞其來尚矣如杜宇作帝
勾踐稱王孫權建鼎峙之業蕭答爲附庸之主而揚
雄撰蜀紀子貢著越絕虞裁江表傳蔡述後梁史考
斯衆作咸是僞書自可類聚相從合成一部何止取
東晉一世十有六家而已乎夫王室將崩霸圖云構
必有忠臣義士捐生殉節若乃韋耿謀誅曹武誅一作討
欽誕問罪馬文而魏晉史臣書之曰賊此乃迫於當
世難以直言至如荀濟元瑾蘭摧於孝靖之末王謙
尉迥王折於宇文之季而李刊齊史顏述隋篇時無
逼畏事須矯枉而皆仍舊不改謂數君爲叛逆書事

如此褒貶何施。荀漢代有脩奏記於其府者，遂盜葛龔所作而進之。既具錄他文，不知改易名姓。時人謂之曰：「作奏雖工，宜去葛龔及邯鄲氏撰笑林載之以爲口實。」嗟乎！歷觀自古，此類尤多。其有宜去而不去者，豈直葛龔而已？何事於斯獨致解頤之誚也？凡爲史者，苟能識事詳審，措辭精密，舉一隅以三隅反告諸往而知諸來，斯庶幾可以無大過矣。

春秋左傳楚武王伐隨將齋人告夫人鄧曼曰：余心蕩鄧曼嘆曰：王祿盡矣。盈而蕩，天之道也。若師徒無虧，王薨于行國之福也。王遂行，卒于櫛，木之下。

春秋左傳昭公三年鄭游吉如晉送少姜之奠，梁丙曰：「甚矣哉！子之爲此來也。」子太叔曰：「將得已乎？」

昔文襄之伯也君薨大夫弔卿共葬事夫人士弔大夫送葬足以昭禮命事謀闕而已無加命矣

晉書劉隗字大連彭城人習文史元帝深器異之歷官湘州都督

後漢書鄧禹字仲華新野人從光武定天下封高密侯明帝時拜太傅

後漢書寇恂字子翼上谷昌平人從光武定天下封雍奴侯

後漢書岑彭字君然南陽棘陽人初封歸德侯以破秦豐功改封舞陰侯

後漢書吳漢字子顏南陽宛人封舞陽侯已破檀鄉賊于漳水定封爲廣平侯

魏書劉昶字休道宋文帝第九子初封義陽王以廢帝北討乃奔魏

魏書沈文秀字仲遠慶之弟子廢帝時累遷青州刺史爲魏所陷終于北

史記吳自太伯至壽夢凡十九世壽夢四子長曰諸樊次曰餘祭次曰餘昧次曰季札及餘昧子僚

立諸樊子光弑僚而自立是爲闔閭吳志虞翻字仲翔會稽餘姚人孫策命爲功曹後

孫權積怒徙交州

隋書經籍志趙書十卷記石勒事一曰二石集記
燕太傅長史田融撰秦記十一卷宋殿中將裴景
仁撰涼記十卷記呂光事偽涼著作佐郎段龜龍
撰秦書八卷記苻健事何仲熙撰秦記十卷記姚
萇事魏左民尚書姚和都撰

史記索隱蜀西南夷舊有君長故昌意娶蜀山氏
女也其後有杜宇自立爲王號曰望帝

史記勾踐已平吳乃以兵北渡淮與齊晉諸侯會
于徐州以淮上地與楚而歸吳所侵宋魯之地當
是時越兵橫行于江淮諸侯畢賀號稱霸王
吳志孫權字仲謀郡察孝廉及兄策薨以事授權
封吳王後卽位改元黃龍謚大皇帝
隋書經籍志越絕十六卷無撰人名氏相傳以爲

子貢作

晉書虞溥字允源高平人歷官鄱陽內史撰江表
傳子勃過江上之元帝詔藏秘書

唐書蔡允恭荊州江陵人仕隋爲起居舍人入唐

官至太子洗馬著後梁春秋十卷

三輔史錄注獻帝時京兆金穉自以世爲漢臣自

日禪時討莽何羅名節累累覩漢祚將移乃發憤與少府耿紀司直常晃太醫令吉本欲挾天子以討魏武時魏武在鄴留長史王必督許中事晃等夜燒門攻必禰等爲內應必奔南城會天明晃衆散魏武收紀晃等誅之

魏志揚州刺史前將軍文欽數有戰功好增虜獲以徵賞多不許恨之正元二年彗起吳楚之分欽喜以爲已祥遂與母丘儉等矯太后詔罪狀司馬景王移諸郡國兵反大將軍討之儉等衆潰就誅欽奔吳

魏志諸葛誕見王凌母丘儉等累見夷滅心不自安甘露二年徵爲司空愈恐遂反司馬文王率衆討之誕窘急乘馬突小城門出大將軍司馬胡奮逆擊斬之

北史尚書祠部郎中元瑾梁降人荀濟長秋卿劉思逸及淮南王宣洪等謀害文襄事發伏誅

北史王謙字勅萬太原人肅國公雄之子周建德中任益州總管隋文輔政謙使賀若昂詣闕昂還具陳京師事謙以父子受國恩將圖匡復遂舉兵兵敗伏誅

周書尉遲迥字薄居羅代人建德中拜太師上柱
國隋文將圖篡奪迥舉兵討之不克自殺
後漢書葛龔字元甫梁國人舉茂才爲臨汾令以
善文記知名

因習下第十九

亦曰邑里

昔五經諸子、廣書人物、雖氏族可驗、而邑里難詳、逮太史公、始革茲體、惟有列傳、先述本居、至於國有弛張、鄉有併省、隨時而載、用明審實、按夏侯孝若撰東方朔贊云、朔字曼倩、平原厭次人、魏建安中、分厭次爲樂陵郡、故又爲郡人焉、夫以身沒之後、地名改易、猶復追書其事、以示後來、則知在生之前、故宜詳錄者矣、異哉晉氏之有天下也、自雒陽蕩覆、衣冠南渡、江左僑立、州縣不存、桑梓由是斗牛之野、郡有徐雍、吳越之鄉、州編龔、豫欲使南北不亂、淄澠可分、其于

繫虛名於本土者雖百代無易既而天長地久文軌

大同州郡則廢置無恒名目則古今各異而作者為

人立傳每云某所人也其地皆取舊號施之于今近代

史為王氏傳云鄉瑯代沂人為李氏傳曰隴西成紀

人之類也非唯王李二族久離本郡亦自當時無此

郡縣皆是晉魏已前舊名號欲求實錄不亦難乎且人無定所因

地而化生于荆者言皆成楚居于晉者齒便從黃涉

魏而東已經七葉歷江而左非唯一世而猶以本國

為是此鄉為非是則孔父里于平昌陰氏家于新野

而系纂微子源承管仲乃為齊宋之人非關魯鄧之

士求諸自古其義無聞時脩國史予被配纂李義琰

傳琰家于魏州昌樂已

代因云義琰魏州昌樂人也監脩者大笑以爲深乖
史體遂依李氏舊望改爲龐而或紀人既言不見從
故有且自世重高門人輕寒族競以姓望所出邑里

此說

相矜若仲遠之尋鄭玄先云汝南應劭文舉之對曹

操自謂魯國孔融是也爰及近古其言多僞至於碑

頌所勒茅土定名虛引他邦冒爲已邑若乃稱袁則

飾之陳郡言杜則係之京邑姓卯金者咸曰彭城氏

禾女者皆云鉅鹿

今有姓卯者姓弘者以犯國諱皆改爲李氏如書其邑里必云龐西

趙郡夫以假姓猶且如斯則真姓者斷可知矣又今西域胡人多有姓明及畢者如加五等爵或稱平原公或號東平子爲明氏出於平原畢氏出于東平故也夫邊夷雜種尚竊美名則諸夏士流固無慚德也

在諸史傳多與同風

如隋史牛弘傳云安定鶻鴈人也本姓原氏至它篇所引皆謂

之西牛弘唐史謝偃傳云本姓庫汗氏續謂陳郡謝偃並其類也此乃尋流俗之常

談忘著書之舊體矣又近世有班秩不著姓者始以

州壤自標若楚國龔遂漢陽趙壹是也至於名位既

隆則不從此列若蕭何鄧禹賈誼董仲舒是也觀周

隋二史每述王庾諸事高楊數公必云瑯琊王褒新

野庾信弘農楊素渤海高頴以此成言豈曰省文從

而可知也凡此諸失皆由積習相傳寢以成俗迷而

不返蓋語曰難與慮始可與樂成夫以千載遵行持

爲故事而一朝糾正必驚愚俗此莊生所謂安得忘

言之人而與之言斯言已得之矣庶知音君子詳其

失者焉

校二十一字

晉書夏侯湛字孝若譙國譙人父莊爲樂陵太守湛自京都定省作東方朔畫贊

史記孔子生于魯昌平鄉陬邑其先宋人也索隱曰家語孔子宋微子之後至防叔畏華氏之逼而奔魯故爲魯人

後漢書陰識傳其先出于管仲七世孫脩自齊適楚爲陰大夫因氏焉秦漢之際始家新野

後漢書鄭玄傳玄紹總兵興州遣使要玄大會賓客時汝南應劭亦歸于紹因自贊曰故太山太守應仲遠北而稱弟子何如

後漢書魏武之收楊彪也孔融曰今橫殺無辜則海內誰不解體孔融魯國男子明日便當褰衣而去不復朝矣

前漢書龔遂字少卿山陽南平陽人不言楚人兩龔傳云兩龔皆楚人也勝字君賓合字君儒世謂之楚兩龔後漢書卓茂傳未亦云楚國龔遂

後漢書趙壹漢陽人光緒元年上言到京師見司徒袁逢長揖逢望而異之問西方事大悅顧

謂坐中曰此漢陽趙元叔也朝臣無有出其右者
請爲諸君分坐
隋書楊素字處道弘農華陰人隋高祖爲丞相深
自結納受禪後封越國公
北史高頴字昭玄渤海蓆人隋文受禪拜納言後
爲煬帝所誅

門人消鑒校

廿百八金山呈新豐

史通訓故卷之五終

史通訓故卷之六

言語第二十

蓋樞機之發榮辱之主、言之不文、行之不遠、則知飾詞專對、古之所重也。夫上古之世、人惟朴畧、言語難曉、訓釋方通、是以尋理則事簡、而意深、考文則詞艱、而義釋、若尚書載伊尹之訓、臯陶之謨、洛誥、康誥、牧誓、泰誓是也。周監於二代、郁郁乎文、大夫行人尤重詞命、語微婉而多切、言流靡而不淫、若春秋載呂相絕秦、子產獻捷、臧孫諫君納鼎、魏絳對戮、揚干是也。戰國虎爭、馳說雲湧、人持弄丸之辯、家挾飛鉗之術。

劇談者以譎誑爲宗、利口者以寓言爲主、若史記載蘇秦合從、張儀連衡、范雎反間以相秦、魯連解紛而全趙是也、逮漢魏已降、周隋而往、世皆尚文、時無專對、運籌畫策、自具於章表、獻可替否、摠歸於筆札、宰我子貢之道不行、蘇秦張儀之業遂廢矣、假有忠言切諫、咎戲解嘲、其可稱者、若朱雲折檻以抗憤、張綱埋輪而獻直、秦宓之酬吳客、王融之答虜使、此之小辯、曾何足云、是以歷選載言、而布諸方冊、自漢已下、無足觀焉、尋夫戰國已前、言皆可諷詠、非但筆削所致、良用體質素美、何以覈諸至如鶉賁、鸚鵡、鵲、童、豎之

謹也、山木輔車、時俗之諺也、蟠腹棄甲、城者之謳也、
原田是謀、輿人之誦也、斯皆芻詞鄙句、猶能溫潤若
此、况乎束帶立朝之士、加以多聞博古之說者哉、則
知時人出言、史官入記、雖有討論潤色、終不失梗槩
者也、夫三傳之說、既不習於尚書、兩漢之詞、又多違
於戰策、足以驗昨俗之遞改、知歲時之不同、而後來
作者、通無遠識、記其當世口語、罕能從實而書、方復
追效昔人、示其稽古、是以好丘明者、則偏摸左傳、愛
子長者、則全學史公、用使周秦言辭、見於魏晉之代、
楚漢應對、行乎宋齊之日、而僞脩混沌、失彼天然、今

古以之不純、真偽由其相亂、故裴少期譏孫盛錄曹

公平素之語、而全作夫差亡滅之詞、雖言似春秋而

事殊乖越者矣、然自晉咸洛不守、龜鼎南遷、江左爲

禮樂之鄉、金陵實圖書之府、故其俗猶能語存規檢、

言喜風流、顛沛造次、不忘經籍、

若梁史載高祖在圖中見蕭正德而謂之

曰啜其泣矣何嗟及矣、湘東王聞世子方等見殺而謂其次子方諸曰、不有其廢君、何以興、皆其類也、

而史臣脩飾、無所費功、其於中國則不然、何者、于斯時

也、先王桑梓、剪爲蠻貊、被髮左衽、充牣神州、其中辯

若駒支、學如郟子、有時而遇、不可多得、而彥鸞脩僞

國諸史、收弘撰魏周書、

收謂魏收弘謂牛弘

必謂彼夷音變成

華語等楊由之聽雀如介葛之聞牛斯亦可矣而於其間則有妄益文彩虛加風物援引詩書憲章史漢遂使且渠乞伏儒雅比於元封拓跋宇文德音同於正始華而失實過莫大焉唯王宋著書敘元高時事

王謂王劭也宋謂宋孝王也劭撰齊志孝王撰關東風俗傳也

抗詞正筆務存直道

方言世語由此畢彰而今之學者皆尤二子以言多

滓穢語傷淺俗夫本質如此而推過史臣猶鑑者見

嫫母多媼而歸罪於明鏡也又世之議者咸以北朝

衆作周史爲工蓋賞其記言之體多同於古故也夫

以枉飾虛言都損實事便號以良直師其模楷

至如周太

祖實名黑獺魏本索頭故當時有童謠曰狐非狐貉
非貉樵犁狗子齧斷索又曰權權頭團欒河中狗子
破爾苑又西帝下詔罵齊神武數其罪廿諸如此事
難可棄遺而周史以爲其事非雅畧而不載賴君慈
編錄故得權聞於後其事不傳是以董狐南史齊舉
於北齊因而埋沒不盡亦多矣目可求班固華嶠比肩皆是者矣近有燉煌張太素
中山郎餘令並稱述者自負史才郎著孝傳張著隋
後畧凡所撰人語皆依倣舊辭若選言可以効古而
書其難類者則忽而不取料其所棄可勝紀哉蓋江
半罵商臣曰呼役夫宜君王廢汝而立職漢王怒酈
生曰豎儒幾敗乃公事單固謂楊康曰老奴汝死自
其分樂廣歎衛玠曰誰家生得寧馨兒斯並當時傳

嫚之詞、流俗鄙俚之說、必播以唇吻、傳諸諷誦、而世人皆以爲上之二言、不失清雅、而下之兩句、殊爲魯朴者、何哉、蓋楚漢世隔、事已成古、魏晉年近、言猶類今、已古者卽謂其文猶今者、乃驚其質、夫天地久長、風俗無恒、後之視今、亦猶今之視昔、而作者皆怯書今語、勇効昔言、不其惑乎、苟記事則約附五經、載語則依憑三史、是春秋之俗、戰國之時、與兩儀而並存、經千載而如一、奚以今來古往、質文之屢變者哉、蓋善爲政者、不擇人而理、故俗無精麁、咸被其化、工爲史者、不選事而書、故言無美惡、盡傳于後、若事皆不

言必近真庶幾可與古人同居何止得其糟粕而

已

校二十一字

春秋左傳成公十三年秦桓公既與晉厲公爲令狐之盟已而召狄與楚欲道以伐晉諸侯是以睦于晉晉侯使呂相絕秦

春秋左傳襄公二十五年鄭人伐陳遂入之子產獻捷于晉晉問陳之罪對曰陳忘周之大德而介恃楚衆以馮陵我敝邑天誘其衷敢敝邑心陳知其罪授手于我用敢獻功

春秋左傳桓公二年取郕大鼎于宋納于太廟臧哀伯諫曰君人者將昭德塞違以臨照百官猶懼或失之今滅德立違而真其賂噐于太廟以明示百官百官象之其又何誅焉

春秋左傳襄公三年諸侯會于鷄澤晉侯之弟揚干亂行于曲梁魏絳戮其僕而授晉公僕人書曰臣聞師衆以順爲武君師不武臣懼其死以反揚干不能致訓至于用鉞臣之罪重敢歸死于司寇莊子市南宜僚弄丸而兩家之難解

鬼谷子書有飛鉗篇

史記蘇秦者東周雒陽人也說趙魏六國約從親蘇秦爲從約長并相六國投從書于秦而秦兵不敢窺函谷關十五年

史記張儀者魏人也始嘗於蘇秦俱事鬼谷先生其後相秦乃說六國事秦謂之連衡

史記范雎者魏人也從王稽至秦說昭王昭王于是用范雎雎言太后專制穰侯擅權于諸侯涇陽高陵之屬太侈昭王乃免相國令涇陽之屬就封而拜雎爲客卿封應侯

史記魯仲連者齊人也好持高節游趙會秦圖趙魏將辛垣衍欲令趙尊秦爲帝仲連乃責而歸之秦將閭之爲却軍五十里

前漢書朱雲字游魯人也成帝時張禹以帝師位特進甚尊重雲上書願賜尚方斬馬劍斷佞臣一人以厲其餘上問誰也曰安昌侯張禹上大怒御史將雲下雲攀殿檻檻折雲呼曰臣得下從龍逢此干遊干地下足矣

後漢書張綱字文紀犍爲武陽人爲御史漢安元年遣使巡行風俗餘人受命之部綱獨埋車輪于

洛陽都亭曰豺狼當路安問狐狸遂奏劾梁冀書
御京師震悚

蜀志秦宓字子勅綿竹人歷官長水校尉時吳遣
張溫來聘宓與言答問如嚮溫大敬服

南史王融字元長瑯邪臨沂人仕齊武帝遷秘書
丞永明九年芳林園禊飲融爲詩序當時稱之上
以融才辨使兼主客接魏使房景高宋弁弁曰昔
觀相如封禪以知漢武之德頃見王生詩序用見
齊主之盛融曰皇家盛明豈直比蹤漢武更慙鄙
製無可遠匹相如耳

春秋左傳僖公五年晉侯園上陽問于卜偃曰吾
其濟乎對曰克之公曰何時曰童謠曰丙之晨龍
尾伏辰均服振振取締之旂鶉之賁賁天策焯焯
火中成軍締公其奔其九月十月之交乎

春秋左傳昭公二十五年鸛鳴來巢書所無也師
已曰異哉吾聞文武之世童謠有之曰鸛之鳴之
公出辱也鸛鳴之巢遠哉遙遙稠父喪勞宋父以
驕童謠有是今茲來巢其將及乎

春秋左傳隱公十一年滕侯薛侯來朝爭長公使
羽父請于薛侯曰君與滕君辱在寡人周諺有之

曰山有木工則度之賓有禮主則擇之周之宗盟
異姓爲後寡人若朝于薛不敢與諸任齒君若辱
貺寡人則願以滕君爲請

春秋左傳僖公五年晉侯復假道于虞以伐齊宮
之奇諫曰獮虞之表也獮亡虞必從之諺所謂輔
車相依唇亡齒寒者其虞獮之謂也

春秋左傳文公四年鄭伐宋囚華元宋人以車馬
贖歸宋城華元爲植巡功城者謳曰睥其目皤其
腹棄甲而復于思于思棄甲復來

春秋左傳僖公二十八年夏四月晉師次于城濮
楚師背鄢而舍晉侯患之聽輿人之誦曰原田每
每舍其舊而新是謀

孫盛魏氏春秋武帝答諸將曰劉備人傑也將生
憂寡人裴松之云孫盛著書多用左氏以易舊文
如此非一魏武方以天下屬志而用夫差分死之

言尤非其類

春秋左傳襄公十四年會于向范宣子將執戎子
駒支親數諸朝駒支對曰我諸戎飲食衣服不與
華同言語不達何惡之能爲不與于會亦無營焉

賦青蠅而退

後漢書楊由字哀侯成都人少習占候爲文學掾時有大雀集庫樓太守廉范以問由曰此郡內當有小兵然不爲害後二十餘日廣柔變叛殺傷長吏發庫兵擊平之

春秋左傳僖公二十九年冬介葛廬來朝聞牛鳴曰是生三犧皆用之矣其音云問之而信

晉書北涼爲沮渠氏西秦爲乞伏氏

北史周紀鮮卑普回因狩得王璽三紐文曰皇帝璽普回以天授已獨異之其俗謂天子曰宇文故國號宇文因以爲氏

前漢書元封武帝改元

魏志正始齊王芳改元

唐書郎餘令定州人舉進士授霍王元軌府參軍累轉著作郎

春秋左傳文公元年楚成王欲立王子職而黜太子商臣商臣聞之而未察告其師潘崇曰若之何而察之潘崇曰享江芊而勿敬也從之江芊怒曰呼役夫宜君王之欲殺汝而立職也

史記酈食其欲立六國後以撓楚權張良曰天下游士離親戚去墳墓從陛下游徒欲日夜望咫尺

之地今復立六國天下游士各歸事其王陛下誰
與取天下乎漢王輟食吐哺罵曰豎儒幾敗乃公事
魏畧王凌將謀廢立與兖州刺史令狐愚通謀單
固楊康并爲愚腹心康頗露其事司馬懿東取王
凌問固曰卿知其事耶固對不知楊康自以白其
事與得封拜後以辭頗參錯并斬臨刑俱出獄固
罵康曰老奴汝死自其分死者有知汝何面目以
行地下也

晉書樂廣字彥輔南陽人代王戎爲尚書令衛玠
字叔贊河東安邑人娶廣女爲太子洗馬

浮詞第二十一

夫人樞機之發、疊疊不窮、必有餘音、足句爲其始末、是以伊惟夫、蓋發語之端也、焉哉矣兮、斷句之助也、去之則言語不足、加之則章句獲全、而史之敘事、亦有時類此、故將述晉靈公、厚歛彫牆、則且以不君爲稱、云司馬安、四至九卿、而先以巧宦標目、所謂說事之端也、又書重耳伐原、示信、而續以一戰而霸、文之教也、載匈奴爲偶、人象郅都、令馳射、莫能中、則云其見憚如此、所謂論事之助也、昔左父裁經、義在褒貶、明如日月、特用不刊、而史傳所書、貴乎博錄而已、至

於本事之外、時寄抑揚、此乃得失稟於片言、是非由
於一句、談何容易、可不慎歟、但近代作者、溺於煩富、
則有發言失中、加字不愜、遂今後之覽者、難以取信、
蓋史記世家有云、趙鞅諸子、無恤最賢、夫賢者、當以
仁恕爲先、禮讓居本、至如僞會隣國、進計行戕、俾同
氣女兄、摩笄引決、此則詐而安忍、貪而無親、鯨鯢是
儔、犬豕不若、焉得謂之賢哉、又漢書云、蕭何知韓信
賢、案賢者處世、夷險若一、不隕穫於貧賤、不充詘於
富貴、又傳曰、知進退存亡者、其唯聖人乎、如淮陰初
在仄微、墮業無行、後居榮貴、滿盈速禍、躬爲逆上、名

隸惡徒、周身之防靡聞、知足之情安在、美其善將呼
爲才畧、則可矣、必以賢爲目、不其謬乎、又云嚴延年
精悍敏捷、雖子貢冉有、通於政事、不能絕也、夫以編
名酷吏、列號屠伯、而輒比孔門達者、豈其倫哉、且以
春秋至漢、多歷年所、必言貌取人、耳目不接、又焉知
其才術相類、錙銖無爽、而云不能絕乎、蓋古之記事
也、或先經張本、或後傳終言、分布雖踈、錯綜逾密、今
之記事也、則不然、或隔卷異篇、遽相矛盾、或連行接
句、頓成乖角、是以齊史之論魏收、良直邪曲、三說各
異、

李伯藥齊書序論魏收云、若使子孫有靈、竊恐未
挹高論、又云、足以入相如之室、游尼父之門、志存

實錄抵訐私於爾朱暢傳又云受暢財賄今故爲榮傳多減其惡是謂三說各異周書之評

太祖寬仁好殺二理不同

令狐德棻周書傳稱文帝

寬仁世至傳稱文如歸命盡種誅夷雖事出權道而用乖於德教是謂二理不同非唯言無

準的固亦事成首鼠者矣夫人有一而史辭再三良

以好發蕪音不求讜理而言之反覆觀者惑焉亦有

開國承家美惡昭露皎如星漢非磨涅所移而輕事

塵黜曲加粉飾求諸近史此類尤多如魏書稱登國

以烏名官則云好尚淳朴遠師少皞述道武結婚蕃

落則曰招携荒服追慕漢高自餘所說多類於此案

魏氏始興遼朔少識典墳作儷蠻夷抑准秦晉而烏

官創置豈關郊子之言、髦頭而偶奚假、奉春之策、祭
言無限、何甚厚顏、又周史稱元行恭因齊滅、得回庾
信、贈其詩曰、杼亡垂棘、反齊平寶鼎歸、陳周弘正來
聘在館、贈常璽詩曰、德星猶未動、真車詎肯來、其爲
信弘正所重如此、夫文以害意、自古而然、擬非其倫、
由來尚矣、必以庾周所作、皆爲實錄、則其所褒貶、非
止一人、咸宜取其指歸、何止採其四句而已、若乃題
目不定、首尾相違、則伯藥德菜是也、齊史魏收李伯藥所撰周史令
狐德菜心挾愛憎、詞多出沒、則魏收牛弘是也、魏史
所撰也所撰周史載元行恭、斯皆鑒裁、非遠智識、不周而輕
等此、本牛弘所撰也、

弄筆端肆情高下、故彌縫雖洽、而厥跡更彰、取惑無
知、見嗤有識、夫詞寡者、出一言而已、周才蕪者、資數
句而方浹、案左傳稱絳父論甲子、隱言於趙孟班書
述楚老哭龔生、莫識其名氏、苟舉斯一事、則觸類可
知、至嵇康皇甫謐撰高士記、名爲二叟、立傳全採左
班之錄、而其傳詞云、二叟隱德容身、不求名利、避遠
亂害、安於賤役、夫探揣古意、而廣足音子新言、此猶
子建之詠三良、延年之歌秋婦、至於臨穴、淚下闔中
長歎、雖語多本傳、而事無異說、蓋鳬脰雖短、續之則
悲、史文雖約、增之返累、加減前哲、豈容易哉、昔夫子

斷唐虞已下迄於周剪截浮詞撮其機要故帝王之道坦然明白嗟乎自去聖日遠史籍逾多得失是非孰能刊定假有才堪釐革而以人廢言此統朝所謂勿謂秦無人吾謀適不用者也

校十三字

春秋左傳晉靈公不君厚歛以彫牆從臺上彈人而觀其避丸也

史記汲黯姑姊子司馬安亦少與黯爲太子洗馬安文深巧善宦四至九卿以河南太守卒

春秋左傳僖公二十五年冬晉侯伐原命三曰之糧原不降退師諜出曰原將降矣軍吏請待之公曰得原失信何以庇之退一舍而原降又云晉侯始入而教其民將用之子犯曰民未知信未宣其用於是伐原以示之信出穀戍什宋圍一戰而霸文之教也

史記鄧都者楊人也景帝時爲鴈門太守匈奴素聞鄧都節引兵去境至爲隅人象鄧都令騎馳射

莫能中其見憚如此

史記趙簡子盡召諸子與語無恤最賢乃廢太子伯魯而以無恤爲太子是爲襄子襄子姊前爲代王夫人簡子葬未除服北登夏屋請代王使厨人操銅料以食代王從者行斟陰令厨人以料擊殺代王及從官遂興兵平代地其姊聞之泣而呼天摩笄自殺

前漢書酷吏傳嚴延年字次卿東海下邳人歷官河南太守冬月傳屬縣囚會論府上流血數里河南號曰屠伯

魏書太祖道武皇帝拓跋珪卽代王位攻元登國史記婁敬齊人也戊隴西過洛陽說高帝鄴關中賜姓劉氏號爲奉春君時冒頓數苦北邊上患之問劉敬敬勸以適長公主妻之厚奉遺之上以爲善乃取家人子名爲長公主妻單于使劉敬往結和親約

史記天官書昴爲髦頭胡星也

周書元偉字猷道洛陽人歷官小司寇建德四年聘于齊會高祖討齊偉爲齊人所執齊平方自齊還度信贈以詩曰獬豸垂棘逐齊平寶鼎歸其爲

詞人所重如此

陳書周弘正汝南安成人仕梁累遷國子博士入

陳宣帝時爲尚書右僕射

北史韋夔字敬遠杜陵人志尚簡澹周文帝備禮聘之竟不能屈時人號爲居士陳尚書周弘正來聘乃造夔談謔盡日後請夔至館夔不時赴弘正乃贈詩曰德星猶未動真車詎肯來其爲當時所欽挹如此

前漢書王莽遣使奉璽書太子師友祭酒印綬徵勝勝稱疾篤使者以印綬就加勝身勝輒推不受遂不食死有老父來弔哭甚哀曰嗟乎薰以香自燒膏以明自銷龔生竟天天年非吾徒也遂趨而出莫知其誰

魏志曹植字子建文帝同母弟也封陳王詠三良詩攬涕登君墓臨穴仰天嘆長夜何冥冥一往不復還

宋書顏延之字延年瑯邪人其詠秋胡詩第四章云歲暮臨空房涼風起坐隅寢興日已寒白露生庭蕪

春秋左傳文公十三年晉人患秦之用士會也使

魏壽餘僞以魏叛者以誘士會及行繞朝贈之以
策曰子無謂秦無人吾謀適不用也

敘事第二十二并序

簡要
總三條

隱晦

妄飾

夫史之稱美者、以敘事爲先、至若書功過、記善惡、文而不麗、質而非野、使人味其滋旨、懷其德音、三復忘疲、百遍無斁、自非作者曰聖、其孰能與於此乎、昔聖人之述作也、上自堯典、下終獲麟、是爲屬詞比事之言、疏通知遠之旨、予夏曰、書之論事也、昭昭然若日月之代明、揚雄有云、說事者莫辨於書、說理者莫辯乎春秋、然則意復一作深奧、詰訓成義、微顯闡幽、婉而成章、雖殊途異轍、亦各有美焉、諒以師範億載、規模萬古、爲述者之冠冕、實後來之龜鑑、旣而馬遷史

記班固漢書繼聖而作抑其次也故世之學者皆先
曰五經次云三史故經史之目於此分焉嘗試言之
曰經猶日也史猶星也夫杲日流景則列星寢耀桑
榆既夕而辰象粲然故史漢之文當乎尚書春秋之
世也則其言淺俗涉乎委巷垂翅不舉憑籥無聞逮
於戰國已降去聖彌遠然後能露其鋒穎倜儻不羈
故知人才有殊相去若是校其優劣詎可同年自漢
已降幾將千載作者相繼非復一家求其善者蓋亦
無幾矣夫班馬執簡既五經之罪人而晉宋殺青又
三史之不若譬夫王霸有別粹駁相懸才難不其甚

乎然則人之著述雖同自一手其間則有善惡不均
精麤非類若史記蘇張蔡澤等傳是其美者至於三
五本紀日者大倉公龜策傳故無所取焉又漢書之
帝紀陳項諸篇是其取也至於淮南王司馬相如東
方朔傳又安足道哉豈繪事以冊素成妍帝京以山
水爲助故言媮者其史亦拙事美者其書亦工必時
乏異聞世無奇事英雄不作賢雋不生區區碌碌抑
惟恒理而責史臣顯其良直之體申其微婉之才盖
亦難矣故揚子有云虞夏之書渾渾爾商書灝灝爾
周書噩噩爾下周者其書憔悴乎觀丘明之記事也

當桓文作霸、晉楚更盟、則能飾彼詞句、成其文雅、及
王室大壞、事益縱橫、則春秋美詞、幾乎翳矣、觀子長
之敘事也、自周已往、言所不該、其文闊畧、無復體統、
自秦漢已下、條貫有倫、則煥炳可觀、有足稱者、至若
荀悅、漢紀、其才盡於十帝、陳壽、魏書、其美窮於三祖、
觸類而長、他皆若斯、夫識寶者、稀知音、蓋寡、近有裴
子野、宋畧、王劭、齊志、此二家者、並長於敘事、無愧古
人、而世人議者、皆雷同譽裴、而共詆王氏、夫江左事
雅、裴筆所以專工、中原跡穢、王文由其屢鄙、且幾原
務飾虛詞、君懋志存實錄、此美惡所以爲異也、設使

丘明重出子長再生記言於賀六渾之朝書事於士
千厓之代將恐輟毫牘無所施其德音而作者安
可以今方古一概而論得失夫敘事之體其流甚多
非復片言所能覩縷今輒區分類聚定爲三篇列之
于下

右敘事篇序
校四字

北史齊高祖神武皇帝姓高氏諱歡字賀六渾渤海瀋人也

簡要

夫國史之美者、以敘事爲工、而敘事之工者、以簡爲主、簡之時義大矣哉、歷觀自古作者、權輿尚書、發蹤所載、務於寡事、春秋變體、其言貴於省文、斯蓋澆淳殊致、前後異跡、然則文約而事豐、此述作之尤美者也、始自兩漢、迄乎三國、國史之文、日傷煩富、逮晉已降、流宕逾遠、必尋其冗句、摘其煩詞、一行之間、必謬增數字、尺紙之內、恒虛費數行、夫聚蚊成雷、群輕折軸、况於章句、不節言詞、莫限載之、兼兩曷足道哉、蓋敘事之體、其別有四、有直紀其才行者、有唯書其事

跡者有因言語而可知者有假讚論而自見者至於古文尚書稱帝堯之德標以允恭克讓春秋左傳言子太叔之狀目以美秀而文所稱如此更無他說所謂直紀其才行者又如左氏載申生爲驪姬所譖自縊而亡班史稱紀信爲項籍所圍代君而死此則不言其節操而忠孝自彰所謂唯書其事跡者又如尚書稱武王之罪紂也其誓曰焚炙忠良剝剔孕婦左傳記隨會之論楚也其詞曰革輅藍縷以啟山林此則才行事跡莫不闕如而言有關涉事便顯露所謂因言語而可知者又如史記衛青傳後太史公曰蘇

建嘗責大將軍不薦賢待士漢書孝文紀末其讚曰
吳王詐病不朝賜以几杖此則記之與傳並所不書
而史臣發言別出其事所謂假讚論而自見者然則
才行事跡言語讚論凡此四者皆不相須若兼而畢
書則其費尤廣近史紀傳欲言人居哀毀損則先云
篤志好學欲言赴敵不顧則先云武藝絕倫言人下
筆成篇則先云文章敏速此則既述才行又彰事迹
也如穀梁傳云驪姬以鴆爲酒藥脯以毒獻公曰奚
來驪姬曰世子以祀故致福在君將食之驪姬饒曰
食自外來者不可不試也覆酒於地而地墳以脯與
犬犬斃驪姬下堂而啼曰天乎天乎吾君之國子之
國也子何遲乎爲君又禮記云晉將伐宋使覘之見
陽門之介夫死子罕哭之甚哀曰宋不可伐也此則
既載事跡又載言語也又近諸史人有行事美惡者
皆以具其紀傳中續以贊論重述前事公梁傳新序

論苑戰國策楚漢春秋史記迄千皇家所撰五代史皆有之但自古經史通多此

類能獲免者蓋十無一二唯左丘明裴子野王劭無此也又敘事之

省其流有二焉一曰省句二曰省字左傳宋華耦來

盟稱其先人得罪於宋魯人以爲敏夫以鈍者稱敏

魯人謂鈍人也禮記中已有解則明賢達所嗤此爲省句也春秋經

曰隕石於宋五夫聞之隕視之石數之五加以一字

太詳減其一字太畧求諸折中簡要合理此爲省字

也其反於是者若公羊稱邾克耿季孫行父禿孫良

夫跛齊使跛者逆跛者禿者逆禿者眇者逆眇者蓋

宜除跛者已下字但云各以其類逆者必事皆再述

則於文殊費此爲煩句也漢書張蒼傳云年老口中
無齒蓋於此一句之內去年及口中可矣夫此六文
成句而三字妄加此爲煩字也然則省句爲易省字
爲難洞識此心始可言史矣若句盡餘贅字皆重複
史之煩蕪職由於此蓋餌巨魚者垂其千鈞而得之
在於一筌捕高鳥者張其萬罟而獲之由於一目夫
敘事者或虛益散辭廣加閑說必其所要不過一言
一句耳苟能同夫獵者漁者既執而罟釣必收所留
者唯一筌一目而已則庶幾胼胝盡去而塵垢都捐
華逝而實存滓去而潘在矣嗟乎能損之又損而玄

之又玄輪扁所不能語斤伊摯所不能言鼎也

校升九字

春秋左傳晉太子申生祭于曲沃歸胙于公驪姬毒而獻之祭之地地墳姬泣曰賊由太子太子奔新城曰君實不察其罪被此名也以出人誰納我十二月戊申縊于新城

春秋左傳宣公十有二年楚師伐鄭荀林父救鄭晉師在敖鄆之間樂武子曰楚自克庸以來訓之以若敖紛冒箠路藍縷以啟山林云云非隨會之語

史記太史公曰蘇建嘗責大將軍觀古名將所招選擇賢者勉之哉大將軍曰人臣奉法遵職而已何與招士驃騎亦放此意其為將如此

前漢書孝文時吳王濞太子入見侍皇太子飲博爭道不恭皇太子引博局提吳太子殺之吳王由是怨望稍失藩臣禮稱疾不朝文帝知其意使者來輒係治之後因吳使者之言乃赦其使歸之而賜吳王几杖老不朝

春秋左傳文公十五年宋華耦來盟公與之宴辭曰君之先臣督得罪于宋殤公名在諸侯之策臣

承其祀其敢辱君請承命于亞旅魯人以爲敏
春秋穀梁傳季孫行父禿晉郤克眇衛孫良夫跛
曹公子手僂同時而聘于齊齊使禿者御禿者使
眇者御眇者使跛者御跛者使僂者御僂者蕭同
姪子處臺上而笑之公羊傳云晉郤克與臧孫許
同時而聘于齊蕭同姪子踊于楫而窺客則客或
跛或眇于是使跛者迂跛者使眇者迂眇者
史記張蒼者陽武人也文帝時爲相蒼免相後老
口中無齒食乳百有餘歲而卒今本已無年字
莊子天道篇輪扁謂桓公曰以臣之事觀之斲輪
徐則甘而不固疾則苦而不入不疾不徐得之于
手而應之于心口不能言有數存焉于其間
呂氏春秋湯得伊尹明日設朝而見之說湯以至
味曰鼎中之變精妙微纖口弗能言志弗能喻

隱晦

夫飾言者爲文、編文者爲句、句積而章立、章積而篇成、篇目旣分、而一家之言備矣。古者行人出境、以詞令爲宗、大夫應對、以言文爲主。况乎列以章句、刊之竹帛、安可不勵精雕飾、傳諸諷誦者哉。自聖賢述作、是曰經典、句皆韶夏、言盡琳琅、秩秩德音、洋洋盈耳。譬夫游滄海者、徒驚其浩曠、登太山者、但嗟其峻極、必擿以尤、竅不知何者爲先。然章句之言、有顯有晦、顯也者、繁詞縟說、理盡於篇中、晦也者、省字約文、事溢於句外。然則晦之將顯、優劣不同、較可知矣。夫能

畧小存大舉重明輕一言而巨細咸該片語而洪纖靡漏此皆用晦之道也昔古文義務却浮詞虞書云帝乃殂落百姓如喪考妣夏書云啟呱呱而泣予不子周書稱前徒倒戈血流漂杵虞書云四罪而天下咸服此皆文如闊畧而語實周贍故覽之者初疑其易而爲之者方覺其難固非雕虫小技所能斥非其說也既而丘明授經師範左父夫經以數字包義而傳以一句成言雖繁約有殊而隱晦無異故其綱紀而言邦俗也則有士會爲政晉國之盜奔秦邢遷如歸衛國忘亡其欵曲而言人事也則有使婦人飲之

酒以犀革裹之比及宋手足皆見援廟桷動於薨師人多寒王撫而巡之三軍之士皆如挾纊斯皆言近而旨遠辭淺而義深雖發語已殫而含意未盡使夫讀者望表而知裏捫毛而辯骨覩一事於句中反三隅於字外晦之時義不亦大哉洎班馬二史雖多謝五經必求其所長亦時值斯語至若高祖亡蕭何如失左右手漢兵敗績睢水爲之不流董生乘馬三年不知牝牡翟公之門可張雀羅則其例也自茲已降史道陵夷作者蕪音累句雲蒸泉湧其爲文也大抵編字不隻捶句皆雙脩短取均奇偶相配故應以一

言蔽者輒足爲二言應以三句成文者必分爲四句

彌漫重沓不知所裁是以承祚受責于少期

魏志鄧哀王傳

容貌姿美裴松之注云容貌姿美一類之言而分以爲三亦敍屬一病也

子昇取譏於君

懋王劭齊志時議恨邢子才不得掌興魏之書非不

幸也蓋作者言雖簡畧理皆要害故能疎而不遺儉

而無闕譬如用奇兵者持一當百能全克敵之功也

若才乏雋穎思多昏滯費詞既甚敍事纔周亦猶售

鐵錢者以兩當一方成貿遷之價也然則史漢已前

省要如彼國晉已降

國謂三國志也

煩碎如此必定

其妍媸甄其善惡夫讀古史者閱其章句皆可詠歌

觀近史者得其緒言直求事意而已是則一貫一賤
不言可知無假推揚而其理自見矣

校十一字

春秋左傳宣公十六年晉士會帥師滅赤狄氏三月獻狄俘晉侯請于王王以鞮冕命士會將中軍且爲太傅于是晉國之盜奔于秦

春秋左傳僖公元年齊桓公遷邢于夷儀二年封衛于楚丘邢遷如歸衛國忘亡

春秋左傳宋萬弑閔公于蒙澤奔陳宋人請于陳以賂陳人使婦人飲之酒而以犀革褻之比及宋手足皆見

春秋左傳襄公二十八年十一月嘗于太公之廟慶舍泄事樂高陳鮑之徒介慶氏之甲作亂王行以戈擊慶舍解其左肩舍猶援廟桷動于薨以俎壺投殺人而後死

春秋左傳宣公十二年楚子伐蕭蕭潰申公巫臣曰師人多寒王巡三軍撫而勉之三軍之士皆如挾纊

史記韓信度上不我用卽亡蕭何聞信亡不及以

史記卷之六
聞自追之人有言上曰丞相何亡上大怒如失左右手

史記高祖二年劫諸侯兵入彭城項羽聞之引兵去齊從魯出胡陵至蕭與漢大戰彭城靈壁東濉水上大破漢軍多殺士卒睢水爲之不流鄒子曰董仲舒勤學三年不窺園乘馬不知牝牡史記汲鄭傳贊始翟公爲廷尉賓客填門及廢門外可設雀羅

妄飾

昔文章旣作、比興由生、鳥獸以婉賢愚、草木以方男女、詩人騷客、言之備矣。洎乎中代、其體稍殊、或擬人必以其倫、或述事多比於古。當漢氏之臨天下也、君實稱帝、理異殷周、子乃封王、名非魯衛、而作者猶謂帝家爲王室、公輔爲王臣、磐石加建侯之言、帶河申裨侯之稱、而史臣撰錄、亦同彼文章、假託古詞、翻易今語、潤色之濫、萌於此矣。降及近古、彌見其甚至如諸子、短書、雜家、小說、論逆臣、則呼爲問鼎、稱巨寇、則目以長鯨、邦國初基、皆云草昧、帝王兆跡、必號龍飛。

斯並理兼諷諭言非指斥異乎游夏措詞南董顯書
之義也如魏收代史吳均齊錄或牢籠一世或苞舉
一家自可申不刊之格言弘至公之正說而收稱劉
氏納貢則曰來獻百牢均敘元日臨軒必云朝會萬
國夫以吳徵魯賦禹計塗山持彼往事用爲今說置
於文章則可施於簡冊則否矣亦有方以類聚譬諸
昔人如王隱稱諸葛亮挑戰興獲曹咎之利崔鴻稱
慕容冲見幸爲有龍陽之姿其事相符言之譫矣而
盧思道稱邢邵喪子不慟自東門吳已來未之有也
李百藥稱王琳雅得人心雖李將軍恂恂善誘無以

加也斯則虛引古事妄足庸音苟矜其學必辯而非
當者矣昔禮記檀弓工言物始夫自我作故首泐新
儀前史所刊後來取證是以漢初立轡子長所書魯
始爲髻丘明是記河橋可作元凱取驗於毛詩男子
有笄伯支遠徵於內則卽其事也案裴景仁秦記稱
符堅方食撫盤而詎王劭齊志述父紇洛干感恩脫
帽而謝及彥鑾撰以新史重規刪其舊錄乃易撫盤
以推案變脫帽爲免冠夫近世通無案食胡俗不施
冠冕直以事不類古改從雅言欲令學者何以考時
俗之不同察古今之有異又自雜種稱制充牣神州

事異諸華言多孔醜至翼犍魏道武所諱黑獺周文帝本名而伯起革以他語德蔡闕而不載蓋龐降蒯賁字之嬪也重耳黑臀名之鄙也舊事例以三史傳諸五經未聞後進談講別加刊定况愁山定續彰於載識杜臺卿齊載識云首牛入西谷逆續上齊丘也河邊之狗著於謠詠王齊志載謠雅雅頭團團河中狗子破爾苑也明如日月難爲蓋藏此而不

書何以示後亦有氏姓本複減省從單或去萬而留千或存扶而除厚求諸自古罕聞茲例昔夫子有云文勝質則史故知史之爲務必藉於文自五經已降三史而往以文敘事可得言焉而今之所作者有異

於是其立言也或虛加練飾輕事彫彩或體兼賦頌
詞類俳優文非文史非史譬夫烏孫造室雜以漢儀
而刻鵠不成反類於鶩者也

校十一字

魏書穆帝初封代王至道武登國改稱魏王太武
真君十一年宋將王玄謨攻滑臺車駕南伐宋文
帝使獻百牢貢其方物

春秋左傳哀公七年公會吳于鄆吳來徵百牢子
服景伯曰先王未之有也吳人曰宋百牢我魯不
可以後宋且魯牢晉大夫過十吳王百牢不亦可
乎

春秋左傳禹會諸侯于塗山執王帛者萬國

晉書初苻堅滅燕慕容皝清河公主年十四有
殊色堅納之冲年十二亦有龍陽之姿堅又幸之
戰國策龍陽君謂魏王曰以臣之凶惡也而得爲
王拂枕席夫四海之內美人多矣間臣之得幸于
王也畢褰裳而趋矣

北史邢邵養孤子恕慈愛特深在兗州有都信云

恕疾便憂之廢寢食及卒痛悼雖甚竟不再哭賓客弔慰收淚而已其高情達識開遺滯累東門吳以還所未有也

列子東門吳子死不哭其相曰公之愛子天下無有今死而不哭何也吳曰吾嘗無子無子時無憂今子死乃與向無子同吾何哭

南史陳將吳明徹寇齊齊遣尉破胡援秦州與王琳共爲經畧還至彭城明徹圖之城陷時被殺哭者聲如雷觀其誠信感物雖李將軍之恂恂善誘無以加焉

前漢書李將軍廣者隴西成紀人也匈奴號之爲飛將軍從衛青擊匈奴失道自到廣軍士大夫一軍皆哭百姓聞之知與不知皆爲流涕

前漢書高祖八年十一月令士卒從軍死者爲櫓歸其縣縣給衣衾棺葬具祀以少牢長吏視葬應劭注櫓小棺也史記不載此事

春秋左傳襄公四年冬十月邾人莒人伐鄆臧孫紇救鄆侵邾敗於狐駟魯人逆喪者皆髻魯于是乎始髻

晉書杜預以孟津渡險常有覆沒之患請建河橋

于富平津議者以殷周所都歷賢聖而不作者必不可立故也預曰造舟爲梁河橋之謂也及橋成帝從百僚臨會舉觴屬預曰非君此橋不立也北史劉芳字伯支彭城人篤志典墳王肅至北未及相會孝文宴羣臣于華林肅語次云古者惟婦人有笄男子則無芳云禮內則稱子事父母雞初鳴櫛櫛笄總以茲而言則男子有笄明矣帝稱善久之

秦記苻堅討姚萇于北地斷其運水之路人有渴死者俄而降雨于萇營營中水深三尺周營百步之外寸餘而已于是萇軍大振堅方食撫盤而詭曰天其無心何故降澤賊營

北史魏昭成皇帝諱什翼犍平文皇帝之次子也道武諱珪乃昭成之嫡孫獻明帝之子此云翼犍道武所諱誤

北史周太祖文皇帝宇文氏諱泰字黑獺代郡武

州人

春秋左傳八愷二曰厯降

國語畢襄公曰吾聞成公之生也其母夢神規其臂以墨曰使有晉國三而異驪之孫故名之曰黑

晉於今再矣
漢晉春秋諸葛亮自至數挑戰宣王亦表固請戰
辛毗持節制之
前漢書項羽聞彭越等攻下梁地謂大司馬曹咎
曰謹守成臯即漢欲挑戰毋與戰勿令得東而
已羽行漢果使人數挑戰楚軍不出使人辱之大
司馬怒渡兵汜水卒半度漢擊大破之
二事在第三條下

弟惟佺校

史通訓故卷之六終